

金粟齋先生文集

金粟齋先生文集卷之八目錄

行狀

明故衡州府儒學訓導中山汪公行狀

藍場吳處士龍山公行狀

梅軒公行狀

瀛峯先生行狀

勤樸汪公行狀

處士一舟汪公行狀

楊母金氏行狀

金母賢五汪氏行狀

范母吳氏行狀

臨漳縣知縣傅巖王君行狀

新塘吳公行狀

姪應奎行狀

西川月山程公行狀

英四族子行狀

環川李徵君行狀

族姪淑行狀

原缺

金粟齋先生文集卷之八

明故衡州府儒學訓導中山汪公行狀

嘉靖戊申夏五月六日衡州府學司訓致仕中山汪公以疾卒於家先是公領今官過德州晚眺悞墮塹折足足愈而躩強之任背瘋繼作脅以上稍瘳而前偃息起履皆不便且時作痛薰心公弗憊致仕歸今且十年矣謂此貞疾當不死竟以是死也悲夫公諱景字仲暘中山別號也貌秀而頎少有逸才落筆數千言立就年十六以事逮於官郡守張公試以放於

利而行多怨奇之勸之學公以明年補學宮弟子自是臺選輒上列至有以三善稱者遂籍謂科第可立取放情於酣酗劇笑至損性靈觸時忌而不顧六舉不第乃降意守貢又值貢例變不以次坐是沮抑欲爲閑退計教諭貞菴李公惜其才留之乃得有今官皆命也在官甫三載清守勤職考必稱最林下之日足迹不履城府至延以賓飲亦不赴然性好親友有造者具雞黍侍杖履耽娛泉石終日不厭奉二親日供甘旨遇家人輩尤愛敬從姪某早孤公撫若已出

從弟濟生長懷寧公勸之歸遜之址棲之澣營室聚
產屹然爲一族冠公之先嘗不能於族分社而祭慶
吊不相通公有識卽以義倡其家及其族人有忿亟
平之俾勿爭有訟室之至今春秋同社祭喜相慶憂
相吊公又嘗率族兄洗脩譜以聯之寘墓田寘同室
無祀之祭死之先預酌家禮定喪禮事宜若干条付
諸子且戒曰吾治喪不用浮屠汝等當守以爲法無
污我諸子有泣下者公曰生順死安但汝等能繼吾
志吾無憾矣公所著有北行學吟稿湘東小稿田居

雜味三卷語曰施於有政是亦爲政然則公之才雖未得大行於天下而施於一家被於一鄉則有不可得而泯者矣公生以成化癸卯十月十三日距今卒之日享年六十有六配吳氏有賢行子五聞詩聞禮聞樂聞教聞敬聞禮儒業媳胡氏餘皆金氏女一再弟適璫溪金俊孫男七時康時平時雍時清時良時亨時安孫女六 考天叙天叙考志亦以貢授潛江縣尹志以上八世孔淳公由旌城徙石田卽今居也孔淳舉宋進士授迪功郎隨州司戶叅軍孔淳以上

六十八世是爲唐開國公鐵佛汪始祖也其世系大畧如此

藍塌吳處士龍山公行狀

公諱珏字以珍龍山別號也休寧藍塌人藍塌之吳出江潭而藍塌有諱義芳者以富甲一鄉義芳生禎祥禎祥生興禮號藍湖俱不仕藍湖美丰姿廣軀而繁鬣豁達有器度生子三公孟也少有異質動舉覺識不類九兒甫志學卽善操奇贏時家無仗資而貸百金爲母公乃歲致藍湖金如母數爲常藍湖莫之

測從容問公曰阿兒何治而得是公曰懼無以逸我親故與時爭而勞困弗論耳然是時猶小治厥後二弟立乃徒業浙醴時醴息正翔而公轉徙流變給發不絕若鉅醴然歲獲千金不啻如是者餘三十年嘗置有產若干畝屋若干楹傭室債邸日有僦入者若干所又嘗置有浙田山屋各若干以便商寄時同醴者皆莫及老於醴者亦莫能解公所以公嘗私語余曰揣摩時勢商之善政也彼惟未達耳予雖聞公語竟亦莫能蹤跡也居家嚴而有則內外斬斬每日秉

燭俟驛宰制庾用直惜鎰銖而延款賓客則惟其所
須莫之計客日接踵至一爨不能供爲之第其物品
自簞食以上各爲簡登其數命一家人婦主之分兄
弟三爨遞爲供應客至輕重索簡咄嗟而辨無留阻
故凡過是里者或親故或諸縉紳無問識不識輻輳
公館門庭喧逐殆無寧時交識豪俊幾半東南說者
謂有孔北海陳元龍風二親歿歲時祭祀虔潔以思
撫諸弟姪篤愛敬生平信事齊雲山神及呂純陽仙
嘗立有齊雲觀玄天金闕榜萬山觀呂仙亭晚年因

購淡竹舍山費三千金以上制於豪右不得營販坐
視餘貲漸耗幾盡嘗欲建永思堂永思橋以致孝思
未得去年正月念五日賫志以卒年七十八卒之先
三日繼使促瑤見瑤先公卒一日至薄暮適公患右
足癢疼伏枕侍兒報瑤見公寐語辭瑤坐候二鼓亦
就枕又一鼓忽聞呼瑤聲急驚起倒衣入卧內覓炬
視公趺坐俯首鼻息縷縷疾呼渺渺無呼吸聲矣憶
公亟召瑤當悟今日事有後屬耶竟不得早半日見
聆一遺言以爲快慢矣慢矣何忍言何忍言配金氏

瑤族姊也婉順有女行別有狀生男一欽娶石田汪氏女二長適瑤次適司訓贈戶部主事溪口汪子昱子培妾程氏生女一適培再從弟里金氏欽程先卒汪氏年二十三守志今年三十四公因汪氏無子晚納妾汪氏生男長三得汪氏生季六得皆幼汪氏以是月念日厝公柩於栗木園未塋禮當預請銘其可以無狀瑤於諸婿中辱愛教最多知公甚悉謹次其大者如右瑤不敢求公於古人今之世稱有豪傑豪傑云者謂公非耶

梅軒公行狀

嘉靖己亥冬十一月十有一日甲辰族姪息縣少尹致仕梅軒公卒於家公諱鼎字調元休寧璫溪人年十六選補郡學諸生進補增廣生補廩生後先凡三十二年應例入監卒業守選十年得今官官三年致仕歸林下又十六年遇疫疾至是卒公幼有大志質凡下日授書不過三五行猶早暮俛首嚙念不輟始成誦然終身不忘下筆惟順說題意句鍵理明無大掄揚故在學大小試多利入比七次弘治甲子已入

榜會有飛謗中郡庠聞於外簾遂以落第或有信公者公曰予不足惜憾不得使老親見吾脫此樊籠耳戊辰例至公乃迅爾颺去不可羈絡人曰子貢期且近何欲速若是公不應比公自監歸而公父仲璋適以老疾卒人乃悟公意然每值國比輒燭溫舊業就院試不厭時年已六十矣其厲志若此謁選銓曹銓曹以公言動之便選以嘗息息民窶而俗多猾公至鋤奸剔強直出守令上丞簿猥以貨公清苦自持不受民一錢民始謂公矯久之乃服公廉時論謂公職

猥而能廉官小而能不畏強禦猶難每上官按其邑
輒加薦獎委屬多越城府而公益盡心求稱晝夜不
得息遂嬰勞疾且值息尹肅琪以被劾逃而檄者遷
怒于公坐以故縱公不悅力致其仕去公之往息也
族人餞之郊公曰是行也有不以禮致仕不敢復相
見嗚呼觀公此言公豈肯戀官贖貨以辱其身以污
其名乎哉歸之日行李不加於舊惟季子彙誕一孫
於任族人又迎之郊公指孫詫曰此予宦囊也今年
甫二八卽能循循幹父蠱族人始信爲廉德之報治

家嚴而有法內外斬然事父母孝處諸兄弟子姪尤
愛敬伯兄嘗鬪死於嚴之吳姓公往白其寃時公猶
在庠人曰吳強宗也撼之難子隸名于官例不得久
曠盍從其調平公曰吾豈以吾兄之讐博一儒冠乎
吾與吳義不得友兵持之益急卒抵其罪撫兄之孤
松勝於已出財產悉無所計松亦善事公猶父也性
尤奮于義視一族事猶一家一家事猶一身事有關
于大義卽以身先之不虞禍愛諸斯文真若骨肉嘗
自以不克大成無以感發後人見子弟有資輒重加

獎借長孫聲幼而敏公誨以儒業聲果以白衣連試
南畿尋廩邑庠雖未卽大成綽有可望足慰公矣公
能詩所著有梅軒詩稿公生天順庚辰四月二十三
日距其卒之日享年八十雖素不事生業而中年以
前馳於功名苦於問學一日不得休休官以後稍就
閑又因仲子槩卒重爲戚戚然猶強排遣至配汪氏
卒遂悲悼不能自勝每言及卽淚下用是日就衰疲
以至於卒卒之先長子榮卒又數日婺媳吳氏卒時
公病已劇家人相戒給公不令知但問榮以就醫對

故公卒之日惟季子彙及七孫在側榮娶汪氏槩卽
吳氏彙汪氏七孫長卽聲娶汪氏次達娶汪氏次業
卽息所生者娶汪氏次愷有至性業儒聘楊氏次康
聘胡氏次實次悌俱聘汪氏孫女三長相嫁陳渭次
滿許聘石田汪奕約以明年某月日遣嫁忽後公十
有六日卒次謝在室曾孫男一伯祥考諱靈壽官靈
考諱希宗希宗考諱恢弘徵士恢弘考諱士賢楚府
典儀其先由白茆遷石田再遷洲陽又遷今居彙將
以是月九日大殯公於本里赤坵降之末瑤語之曰

夏存正集 卷八
爾翁雖八品官無墓典然亦朝廷一命士墓其可無
銘傳彙遂請瑤狀公行以爲信瑤在群從中辱公愛
最厚不容以不文辭乃以鄉人所常道及瑤所目擊
者狀如右嗚呼公素愛瑤言使得及公在朗誦一遍
爲公聽當有撫節稱賞踴躍不自勝者矣

瀛峯先生行狀

先生諱天琪字韞之瀛峯號也與予同出五世祖大
使公下其先自白茆三遷至瑤溪代有隱德達仕高
祖諱覺

國初以人材舉爲汲縣知縣曾祖義祖簡父鑑俱未仕鑑性好恬退號恬菴未四十卽以家事委先生及伯兄珪伯兄善操奇贏坐貨於其村西澣以持家自任先生有美質能自揣摩爲詞章惜時無誘引之者遂亦尾伯兄以驅馳伯兄治庶務而一切賓客門庭戶役皆先生一身酌應而猶日與先伯父時習時用二公弄筆墨往來不忍棄舊業二伯父素善詞章而先生晚輩好勝日索題唱和博論笑鬧伯兄知其好亦遂不責以家政而縱先生遊談兄弟所志雖不同

而自幼及老並未聞有相猶之異同異者三十餘年伯兄每色怒先生輒怡怡立侍顏所居軒曰怡樂人謂先生兄弟真無愧怡樂也待諸子姓嚴處家庭和御鄉族尤以恩每以其餘力庇人不及而不責其報施藥施茶終其身不倦客雲間嘗與陳朴菴朱正之諸詩人爲詩社先生詩務調聲響謂必聲響佳然後入律雲間人稱先生詩脫得徼人山林氣爲人有膽氣性急而尤激於義嘗有讒人假民情誣搆雲間大姓八家於撫院而連及先生坐罪先生不平子身赴

奏率至反坐乃已雲間至今以爲德而又服其能謂此讒不連及先生餘人皆默默沒齒含冤矣同事有焦氏子者爲文徵詩頌其事焦子亦善詩遂結先生爲詩文交而先生詩於是愈益精確焦子之力也有瀛峯詩稿藏于家先生又有志於譜嘗輯有家乘一部無慮千篇卒以年不永未就中年尤好消彭脩煉術不知其何所師授每一作爲輒屏家務避人事潛以其教營度運用自以爲效在旦夕每見人談及輒解衣捧其腹以示曰此腹已堅如石嬰兒就矣可用

靴尖踢無傷也而不久遂因是致疾不可救蓋其性
好自用中間必有助長逆氣取速之病病之日猶乞
乞自負若有可生者而不覺奄忽氣絕不能一語及
家事而卒時嘉靖丁亥十二月一日也距其生成化
乙未十一月九日得年五十有三子三長鴻志娶鴈
塘吳氏次浚娶西館程氏次涯娶金塋汪氏女三長
愛章適金塋汪本次益章許聘石田汪寄子生三福
章許聘杭溪張梁子焯配汪氏渠濱人識大義善內
助鴻志等將以

月十八日殯先生於瀛麓謂瑤與

先生爲服親託斯文好且厚匍匐請瑤狀先生行瑤不敢委救淚而狀之如右

勤樸汪公行狀

予嘗記翁勤樸堂頌翁八十適二年翁卒又一年翁諸子遣使丐予狀翁行翁予從伯常軒先生婿也又與予爲兒女親遇予特厚每一相接傾倒肺腑無諱情趨侍周旋曲盡禮意至於休戚義尤相關記以志喜狀以飾哀哀言多傷記予爲之予忍能狀翁耶雖然行非狀不傳予知翁獨深予忍能不狀翁耶翁諱

廷樺字器之號都嵩山人勤樸者翁之堂名翁名堂而
又以自號者也爲人胚渾中有穎異存心以誠制
行以直與人煦煦相取下雖素所不悅未嘗輕以貌
傲及口舌相侵事至其前初若無辨少則析及幽眇
指進爲方法逆此事後當成敗若燭照然及見之行
益加審慎間有禍福則又毅然以義斷之無畏怯故
終翁之世鮮有敗事閨門之內從容以和自少至老
未嘗見其疾言遽色訓諸子必以義方嘗諭諸子曰
吾家累世忠厚一脉屬在汝等幸與培植之諸子確

奉庭訓循循雅飭綽有翁風此翁行之大端予所目擊者也其諸恩之推一門義之倡一宗禮之崇於其先惠之廣於其下口碑嘖嘖難以悉數予嘗思狀翁曰溫然瓊玉盎然陽春狡僞者獻其誠暴慢者致其敬老者倚以爲蓍龜少者孺以爲慈母古溫伯雪子程伯子之亞使其知學聞聖賢之道豈止爲勤樸翁哉翁歿嘉靖辛酉七月六日距其生得年八十有二嘗拜旌壽冠服配金氏予從姊媿德不虧子男三尚德娶朱氏尚厚娶金氏予女尚嗣娶楊氏潯州府推

官芳溪女女三長瑞第適祁門黃瀾次想弟適婺源
吳鑾次雲第適國子生予族孫聲孫十時生娶金氏
予族姪女時遷娶黥歐陽氏時迪娶吳氏時來娶楊
氏時逢娶吳氏時健聘陳氏時通聘楊氏從龍聘吳
氏時成時順女孫三新閨適吳成謙免閨妙閨曾孫
三鍾秀鍾震鍾義曾孫女

考諱福澤祖諱齊

敬曾祖諱璉並有隱德其先出唐越國公長子建後
初居績溪遷萬安再遷芳塘三遷而至今渠口云

處士一舟汪公行狀


邑後街汪生賓從學陳生子心謂予子心從也遂以
事子心者事予予弗任而賓之禮益至每見輒質其
所疑側立偶坐徐行怵怵執門下禮惟謹予自入宦
來不相見者六七年今年九月候予郎山纍然經麻
乃知其有廼翁制也又越月躬執幣來請曰賓兄弟
將以後月十三日厝我先翁斷石先壟旁先生未識
翁然言足傳也敢次我翁行以乞狀且曰不肖吾父
則非吾父賓焉忍以非父父也翁諱當字景達別號
一舟五歲喪父母程鞠誨之至成人父將喪指翁囑

程程哭翁亦哭且哀人曰是兒五週而父囑哭豈惟育其有立乎比就學恂恂異諸兒俊茂穎達綽有進階苦無資俛首醜販吳越間然而翁之心不自降暇日輒繙閱舊籍繹其緒或時弄筆札抽寫胸臆寄懷託興詠諷自娛若有脫落富貧賤貴超然世外者嘗語人曰此中有真樂縱不能咀華嚼英爲儒者事顧可廢乎齷之息視他販厚然非蠅營狗苟日逐逐者不可得翁治之一守時禁故醜若干年而貲不加饒年五十遂棄歸曰人生待足何時足乎榜安分二字

楣間以見志治家嚴而有則事程曲盡孝養死之日
哀毀骨立既葬哭之曰我慈矢志豈爲其他生無以
爲養歟無以爲葬我卽死有餘辜矣平居不輕出門
戶有造者雖貴介非其常所往來者不屑見終日闔
室默坐觀書外惟樂談星命其於市俗一切遨嘯徵
逐侈靡之態子母釣取之習泊如也丙午九月十四
日以疾卒年五十七卒之日惟賓在側囑之曰所望
以畢吾志以光汝祖母柏舟之節者汝也勉之遂逝
娶栢墩吳氏有淑行子三長宇次宦嗣翁業次卽賓

儒業宇娶吳田吳氏宦娶南門夏氏賓亦娶栢墩吳氏女一適下東金彪皆名族孫男三淵淞溥父寬甫卒年四十二大父瑛貢入監舉從同邑程襄毅公征南寇有功坐足疾弗克趨朝受擢賞授七品散官曾大父某由邑西門遷今居汪氏爲吾徽著姓西門之汪又諸汪之著統出唐越國公後

楊母金氏行狀

母板橋楊君  妻璫溪金處士延年公女汲縣知縣德馨公玄孫也汲縣之兄鈍齋公予高祖也嘗贅

板橋楊教諭心遠公家旣而以長子無贅法告歸宗
故予家與心遠公後世有姻聯母生而柔惠寡言笑
不逐群女競紛華延年公意母有女德慎相攸楊氏
之初求聘也適母捧糜一器墜地而器糜兩全曰此
吉徵也遂許聘且曰此女後當保有完福乎年十八
歸楊君始至動履循禮事上使下罔不獲宜內外人
翕然謂楊氏得婦時舅姑俱故惟二伯舅姑在母事
二伯舅如舅二伯姑如姑妯娌間怡怡無間言夫妻
相與真如賓客楊家素清儉而母出豢養人謂母或

弗堪旣而母甘心淡泊布衣蔬食執井臼炊爨織紉
晨夕作苦無少怏怏見言面君嘗欲爲治生計而語
母無資母曰治生度民本務君有志妾當倒來篋以
從於是悉出其嫁日所有簪珥盤悅諸飾物昇揚君
令其易資以行初年猶未達否喜相半僅能持家無
長益年四十外生理日熾所得歲倍家道全興稅產
子本十倍于前舊居倚山隘而阻至是議遷居前畝
外門中堂後寢內舍廟塾厠踰庖溷之所爲屋共若
千楹而一時俱舉歲增月附今遂巋然一村落歲甲

辰大饑人十九不聊生楊君語曰道上嗷嗷蒙袂者
接跡矣有人心者能憇然我家今歲尚餘粟若干毋
遂計日餽糜足歸餘於楊君多寡分給活人甚衆居
常惟理家政無外事惟諸子有事正以義方生子曾
錫宜錫慶錫騰李生子一餘錫母視李如娣視餘錫
如已出曾錫因苦寢二月感疾卒宣錫商巨商慶錫
儒今太學生餘錫亦商埒於宣錫楊君卒時執母手
訣我累有此資此產皆荷汝簪珥及汝勤勞所致汝
命取若干以優汝三子母涕泣謝曰皆君之遺體我

何敢有貳心以啓外議楊君感母誼遺命歲上母贏粟二十畝贏金二十四金任母役用不必問出入母視此金粟如楊氏祖遺不惟不敢私其子雖外家亦未嘗輒有所與李之日遺命以此金粟貯爲父母埋瘞費先一日呼諸子孫立床前諭之曰我死無他憾惟誨汝輩治士者俱未見有成幸勉之他日有能戴冠束帶拜我墓前有餘喜矣次日李萬曆癸未九月十五得年八十有九噫延年公謂母當保有全福今其驗矣壽如是家計如是生順死安如是而攸好德

一念尤其素然此豈人力所致謂非天耶曾錫娶金氏母族先卒宣錫娶金氏母從姪女慶錫娶吳氏餘錫娶程氏繼吳氏女三寶閨適婺源國學生汪某大珠適母從姪耀小珠適汪世忠孫六一元娶吳貢士行之女一學娶陳氏繼汪氏一和娶曹氏一桂娶汪氏一敬娶汪氏一元一桂一敬皆國學生安未聘孫女五靜閨適汪五富新閨適汪蘭孫俱先卒香閨適母再從姪孫喬新監閨字張某子某京閨字汪某子某曾孫八維喬聘戴某女連久聘張某女雙久聘朱

舜女三久聘喬新女世久夾孫個兒俱未聘曾孫女
八舜女適汪某芳女適吳某少女字予孫維鷹有弟
字張某子某閨女字吳某子某美玉字國學生汪四
英子某來孫字國學生汪雲英子某引弟字許叅政
某子某滿女未聘宣錫等將求母銘傳於大方君子
以瑤與母兄弟行摘母之行請綴爲狀瑤與母同庚
又居室先後相際少時稔識母瑤之狀母也固宜惜
乎瑤也言無枝葉無以粉飾母之行使暴著以改觀
者之目然而狀人之行者惟當敷其實固不在粉飾

炫人爲也

金母賢五汪氏行狀

汪氏予諸姪孫楷妻以今年正月七日卒十月一日
權厝下案于之末季嗣諸生忠集汪氏行請予綴爲
狀以垂不朽忠集皆一節舉柯葉以擬根幹者也卽
使柯葉悉具根幹可得而識乎予與汪氏居連廬得
於耳目者甚詳汪氏貌頽而願恬靜柔淑寡言笑不
羨榮利不厭貧賤與人無競然而自治嚴口不道人
過失人質之以忿輒善辭譬解退而默默不構論是

非不生事端行如其言言如其心居閑無事勤女紅
或闔戶默坐不逐諸婦遊謔非有故不輒出中庭人
罕見其面言動之際恂恂于于諸子婦終日侍側未
嘗見疾言遽色布衣蔬食終日晏然禮稱婦有四德
汪氏有焉卒之日子賢不在側語章曰汝父先誨汝
舉業未就又移以誨忠爾輩其勉力爲忠奉 例行
以終爾父志言訖而歿汪氏生以其年月日距其卒
之日得年八十有三子四長芳早卒次賢娶吳氏繼
程氏次章娶黃氏繼朱氏忠娶汪氏女一適石田汪

玉孫男四伯敏伯祖伯佐伯武伯敏娶汪氏孫女九
某某係出石田汪氏諱寶秀賢五行也曾祖澱祖播
父徵母胡氏予聞徵古君子徵長子寬次子宏王府
紀善皆純雅如玉與汪氏同德說者謂俱有父風然
則汪氏之賢淑固其性然抑亦其家教有自云

范母吳氏行狀

余性喜作文然不喜爲人作狀傳懼犯諛墓中人之
戒林塘范子本漢從予遊者數年行質而言覈余愛
之不相見者十餘年時往來余懷一日遣价資幣爲

其姪樞請狀婦吳氏行予未識樞識本漢本漢其忍予欺乎有言必信按行畧吳氏商山吳處士思葵女名族有女德思葵最鍾愛相攸適樞不惜數千金爲粧齋吳氏勤儉若寒素事舅姑孝和於妯娌於相樞也以禮不惟主中饋樞有事必咨吳氏然後行所賴以商畧籌度得免過愆者尤多樞家亦不貲父東溪嘗腰纏十萬於揚州媵侍滿座隅吳氏御諸媵如貳姑無違禮諸媵譽之不絕聲生子玠甫十歲訓以義方甚嚴人曰玠且齒胡爲重縛束使馬牛如吳氏曰

吾正懼其長而馬牛也夫御馬者必羈的御牛者必輻衡不如是不可求其良矧童馬牛乎吾茲以御馬牛者御蚡也思癸翁病親嘗湯藥事寡母歲時饋遺尤慤慤凡林塘言婦道者首曰吳氏吳氏云吳氏以今年某月日卒享年僅三十四男一卽蚡也女四長字吳氏族子某次字吳田程某子某三四幼樞將以是月某日殯吳氏於某處之原或曰吳氏宜壽而夭予曰壽不以年而以德吳氏之行有三難富而儉一孝而及於舅之媵二父卒而孝不衰於寡母三三者

有一焉且足以不死吳氏天豈其天哉

臨漳縣知縣傅巖王君行狀

王君諱作霖字潤世傳巖其別號也全椒人生而聰
了異常在小學日誦數千言年十二補邑庠弟子二
十以春秋薦南畿鄉書明年春試不第入南監大
司成沈公奇其文拔以冠六館一時南中縉紳

士夫莫不贊頌籍籍冀獲一交驩爲幸君學博而瞻
墳籍外諸子百家言罔不讀爲文步漢魏以上詩歌
彷彿晉唐嘗有詩文若干卷行于世先後七試春官乃

謁選得知河南臨漳縣以去君之治臨漳也以興舉
學校爲首務其次導民藝植臨漳故多蠹政而縣吏
相繼安以爲常歲費額止二百金而私取於民以足
費者或十倍之歲積穀石三千而常征不及往往貰
貸於民以取盈官馬霸養於土猾民瘠而馬不肥賦
入截收於市頑私橐充而倉人府人多逋負君始至
廉得其狀遂以情鳴於當轄歲費益數三倍歲積損
十之三均在籍之稅以飼馬立堂收之法以入賦今
觀其所上議疊疊數千言雖出一時之研揣而斟酌

哀益悉中肯綮足爲臨漳世世法隸人之索錢天下
通敝也豈獨臨漳而臨漳之隸不待索一奉縣符則
貨至有差君曰習使然也非一旦所能革如必以隸
役則雖家置一喙無益也於是爲之木偶如隸數偶
命之名名定之事事限之期委任責成一如隸然而
有事則以里魁擁之行事雖非制而足以免其手口
之貪取旣而行之數月民皆體君之心而驩呼效命
事益以集於是上官多君能署以上考致有謂其文
章政事足追古人者惜其望治大殷過於自役未一

載而卒於官無以觀厥成噫惜哉君爲人侗儻能有
爲尚氣節已然諾不爲滑稽脂膏之態以取容於時
善善惡惡根其天性家庭上下孝愛禮讓藹然兼至
持家儉卽小物必惜衣履不敝不改爲也馭群小以
恕不責其小過鄉人有以急告者母問踈親近遠咸
隨分賙之野有遺糞施之木且瘞焉此其較也君生
嘉靖癸未十月六日卒以萬曆戊寅九月六日得年
五十有六妻魯氏子二宣韶娶龍江右衛指揮朱鳴
陽女宣武縣學生娶儒官盛會女其先世家金陵七

世祖寧祐以豪俠從

高皇帝南征累戰功官指揮使弟寧祚扈

文皇帝入燕擒斬稱上意官如兄寧祐長子肇允隨
居燕次肇亨留金陵肇亨生寬寬生政政生長鸞次
鵬鵬豪逸好嬉遊薄鸞陰來全椒贅居焉故今爲全
椒人卽君大父也鵬次子珮號埜浦授高年冠服生
君予未識君面次兒應鍾賈全椒與君爲布衣游君
之以視歸也應鍾吊祭焉宣韶遂摘君行實以幣委
鍾乞予編爲狀予嘗作君傳巖說不能以無文辭謹

編之如右

新塘吳公行狀

公諱佛童字景芳新塘號也邑東吳田人生而岐嶷
父母最鍾愛嘗曰是兒標格不群異日不能取貴當
富矣比長好文藝坐家累弗克進取然日披群籍不
廢尤究心堪輿家新塘巖坑諸墓皆其手扞新塘之
號取諸扞也世殷富公又以田農爲業日夕課肄耕
歛間籌子母法以轉相孳育今其所積視祖貽不啻
幾倍然其素織而作力雖處豐饒而早必蓐食息必

焚燭見跋服被歛啖輿馬皆從省約或失則固者有
之乃其性然非矯也治家和而有則內外千指無間
言居二親喪塋祭率以禮訓諸子尤有義方嘗戒諸
子曰汝父不讀書然所事未嘗敢悖聖道汝輩宜勉
力以就生理志進取者以聖賢爲歸餘子亦當蹤跡
乃祖考無落群俗輩衣食僕御不汝累皆祖考遺惠
母忘乃祖考則世有豐亨矣故今諸子率以道義疊
疊相承遵遺教也與鄉人處降志遜抑雖犯不較值
有事必以義先族嘗議建祠公捐田若干畝以倡某

橋圯公命工脩之某路塌斃之有以貧不能婚葬或
塋無棺告者輒加軫恤以不平鳴而賴公有言息機
牙者猶多邑之故稅長歲一僉諺微轉其音誚爲刷
長言其戶刷之也然不刷則所償多公應是僉者三
人初噦公曰是夫雖義懼難以已物償公費必刷諸
公曰邑長我正以費我也吾敢費諸人以速戾於是
常征外不犯一毫歲償幾三百金弗厭邑大夫濟川
宋侯聞其行舉以射賓爲衆勸嘉靖乙卯十一月念
有一日以疾卒卒之日命以新塘諸墓所近產供墓

祀費諸子齊應曰諾公始瞑距其生之歲弘治丙午
享年七十配汉口汪氏繼救寧胡氏繼程氏側室金
氏郭氏子五長良玠金出次良珮胡出次良璧良瑞
良玉皆郭出玠娶林塘范氏先公一月卒珮娶隆阜
戴氏璧娶峽東金氏女五寶錢寶英寶員寶弟皆汪
出寶閨郭出寶錢適隆阜戴汶寶英適隆阜戴天鎰
先卒寶員適予次稚應鍾亦不幸先卒寶弟適城東
邵正輔寶閨聘城南曹權次子京元孫男二大綬大
繼孫女六轉弟育弟月容嬌容妙容願弟俱幼公考

尚明尚明考希仁希仁考思端皆不仕思端以上世
有文人達宦茲不載系出吳仲雍後其後有諱超者
唐 遷吾郡又四世閬州守依舒遷今居稍雲吳
田玠等將以丁巳十二月十有七日厝公于新塘之
源先期賫幣匍匐走予瀛麓耕舍乞予狀予受知于
公甚早繼有姻婭之連又於玠有一日之雅知公最
深因叙其所覩記者如右噫若公可徒以素封多之
耶

姪應奎行狀

奎字子文予總服姪也年十六失父卽有志幹蠱初商雲間以倭亂轉轂桐之雙渡雙渡奎大父坦翁所開基弘治間坦翁道雙渡覽其周墟諤然曰此地水陸會真一市區也遂質錢氏地若干辟爲一廛以自市數歲生理殖又增辟一廛於是群商人競奔走焉蜂逐蠅附不約而合今爲一都會而坦翁卒有廛在者六奎之在雙渡也土人周錢王劉四大家謂爲坦翁孫皆接以通家奎又執禮敬締驩諸賢士大夫而諸賢士大夫交口譽奎由是奎之生理遂與坦翁時

埒雙渡雖安慶屬去池僅一江池有逮隸持片紙卯
至辰發以爲常時獲有鉅盜池吏誘盜誣雙渡二鉅
商隸入門拳去奎奮然曰盜重犯也不早辨而遽以
遽行是以羊投狼群而恣其啖事其可已遂倡市人
亟以情言縣縣言行臺臺嚴下越境追呼罰大榜各
屬以示警而三商獲免於是雙渡民情大暢以爲奎
奇男子也縣大夫燕北陳侯亦知有奎署奎爲市長
市有等言皆先詣奎奎亦克自砥礪不以長爲市大
爲市人所尊服時有大姓郝氏亾妾縣不能辨以委

奎奎使人迹妾捕以歸郝郝厚酌奎奎不受郝氏曰
有勞而酬非有索也何故不受奎曰縣以市長我是
勞我也偶有勞而受酬是以長賄也卽子不我求縣
天夫其謂我何郝人乃黽勉而退一時在雙渡者咸
謂奎能又謂奎絜不惟慕奎莫不敬奎桐先達注野
趙都憲渾菴戴副憲以正學迪後進奎亦執贄立門
下時有所陳說二公皆竊嘆以爲奎已學商迹而儒
心當於古魚鹽鼓刀中求之時與往來年四十九以
母老委業於子 歸母時已八十奎問寢視膳日無

遺家無剩齋每食必有酒肉每出入必躬扶腋歲時必致水土物爲壽州間燕集必袖其品物佳者以遺愉色怡顏盎然可掬雖時有所忿值母來必霽母亦鑒奎意怡然以自老無他求奎細行雖不能一一慊時論而孝親一念實出真誠非強作者性機警有膽氣人不能欺遇有無故之加凝然若罔聞知無幾微見言面尤便口說鄉里有訟事奎居間無不立解卽在官奎亦能緩頰移官聽遇鄉人曲有禮意值予輩尊行尤加敬予性好夜坐奎時來侍坐予見子姪來

多舉其過以示教諸子姓畏予言率不敢來坐獨奎坐如常然則奎不能盡從予言而不厭予言亦自足多况有潛奪默化如予言者不知其幾也奎體肥而碩去年臘月十七日以痰疾卒得年五十九卒之日子不在側唵嚙屬侍人傳言 勤侍祖母無落莫卽死不恨越月爲萬曆癸未二月念一日奎六十初度 奔喪歸手捧桐緇紳頌言數幅懸喪次華篇爛照几筵而人已長寢不可覩矣迹與情乖見者悲悼然 治父喪用能以無爲有以厚父則奎臨終之囑

庶其能無忘乎姑俟之奎先娶汪氏能相夫幹蠱生子一娶戴氏女一玉英適吳文遷繼朱氏生女二德英適胡夢鯤引弟聘戴儒孫維成孫男三廷奇廷宰廷敬父諱時祖諱縮卽坦翁曾祖諱筌高祖諱吾侍御士輝公弟俱不仕予與奎俱出高祖下

西川月山程公行狀

予姪孫維翰託婚於月山程公因聞公姿儀甚偉快一覩而未能萬曆

予有事公家公帥群從郊迎遙見群中頎然高出者異之疑爲公旣而登拜叩姓

字果公也公眞魁梧奇特哉後九年己卯四月十二日公卒嗣子鑿將殯公於東山之陽摘述公素委維翰謁予次爲狀公於四民商也職主利主富其家利不以義制富不以禮持俗商也按狀公早受士業坐家冗抑而從商旣業商毅然以起家爲已任懷貲江湖間不避險劇不廢寒暑趨時爭便每出群商先故商不數歲資產視舊倍不啻持家儉而不過終身不御綺羅文綉家庭內外秩然有辨尤知以義用利非其義也雖小必慳如其義雖大不惜握筭及毫抄而

周恤貧匱畧無靳色人或以困乞公倒困廩以給不能償卽焚其券縣大夫樹城募役各屬富室凡募及者皆百計求免公獨慨然出帑若干金以應縣脩學舍募公又慨應如前伯兄瑚死止一子某又死瑚資產與公埒人謂公必爭公先倡言曰嗣以長繼禮也某焉敢以貲產故有異議遂遜次兄璉孫沂嗣某後處兄弟友愛訓諸子以孝弟忠厚爲先嘗曰汝父愧非仕途中人然處心制行未嘗一事苟爾曹所見爾曹能以禮義自持薄產自足以濟不則千金萬金何

益但誨子孫怠墮耳生平豁達負奇氣遇事敢爲無一切突梯脂韋闕茸之態晚歲縣大夫以年德虛禮禮賓席以召公堅卧不赴語云人貌榮名無旣予觀公之貌則占公之必有爲觀公之榮名則信公之貌不虛生矣而謂其無旣可乎公諱積富號月山生正德乙亥七月十有一日距其卒之歲得年六十有五娶渠口汪氏與公媿德先公卒繼姚氏子三長鑾娶汪氏繼葉氏仲釜娶許氏季璜娶曹氏女一四閨婿卽維翰也皆汪出孫男二涓娶汪氏洲幼孫女四轉

弟字陳氏轉璋字汪氏遷第三弟俱幼父諱滿祖諱道順曾祖諱顯宗俱潛德弗仕係出晉新安太守元譚公後歷六朝至宋隆興間有諱大者由歛篁墩遷西川於公爲十五世祖西川公今居也

英四族子行狀

英四諱秀字世彥予族從中素與者也甫三歲失怙與兄烈昌俱鞠於母氏家故無厚蓄兩災於火遂益貧母拮据徬徨以食三子烈長學事於叔良質氏昌天秀在小學僅五年但能記姓名餘日事樵蘇採拾

以資母薪蔬年二十二始聘娶娶餘月母喪襄事秀
遂屹然求自立曰丈夫志四方終不效庸奴輩終日
尋丈間營營計衣食不足以度此生何以爲人吾家
世業賈道里便莫如蘇松蘇松東南一都會也又吾
叔兄輩咸在於是幡然釋故所習從兄遊初亦起學
事勤敏纖蓄以時萃累不數年貲漸肥乃與兄分賈
兄在香山第朱家角地雖狹小而土人工於市易賈
中遭倭寇兄弟轉轂江之北與予家比市倭遷又各
復其故而江北賈至今並峙于時兄饒而弟亦競爽

所生資產視父存日十倍不啻家用以裕秀在賈識
時善調度口如其心不飾行儻隱賈人多就之故其
興也泉湧沙聚不見其爲卒然高深年六十五息林
下家庭內外事無鉅小皆其所役秩秩有條無滲漏
秀猶富精力畦圃豚雞瞭曝之藝時不鄙親之性嗜
酒日嘗三四飲飲能至五觥七觥味必苦乃暢甘則
蹙眉搖首以起微醺携諸孩幼嬉門前或上下市肆
間談時事市賈得意輒抵掌大笑然自幼至老人未
嘗見其醉亂短褐扉履終日晏然雖不知文義而知

大義每有義議秀必同聲以和尤知重儒人命季子業儒歲如二兄賈儻歸之以免其內顧勲亦承父意勃勃有奮勇上邁意氣縣嘗以賓禮禮秀使兩至秀輒埋迹不與見其率性而不欲外飾如此先娶汪氏年四十未有子因納側房陳氏而汪氏始生子伯齊陳氏復生三子伯玉伯勲伯齡伯齡入小學而秀已老每見予惓惓羨予壽曰秀得如翁年則子債畢矣予曰而貌古而精晦癯而力壽當超予上孰意其一疾而遂不起竟不能如所望然年七十八壽矣伯齡

雖未昏而斬然頭角勝衰杖從諸兄後比釋衰則成人矣秀復何憾秀以窮巷崛起率至比素封若秀者謂非編氓中一奇男子耶秀生弘治甲子十月二十四日率萬曆壬午正月二日汪氏渠濱汪姓女有淑德生伯齊七週遂率陳秉內政善自晦人罕見其面秀老年賴陳侍養以怡日陳先亡月率秀遂奄奄疾轉劇不可治伯齊娶縣學生汪泉達女卽汪氏族女伯玉伯勳皆娶石田汪氏伯齡聘藍渡陳氏女素聞適板橋縣學生楊洲轉弟適婺迥嶺汪廷松皆汪出

女閨適石田汪萬慶復弟適石田汪鐘皆陳出孫男
二師規師望女一好英父杲祖海曾祖瑛俱不仕曾
以上凡七世至始祖皆仕其先山白茅山白茅遷石
田再遷湖陽一遷瑞溪即今居詳見譜

環川李徵君行狀

徵君諱大新字相誠別號松峯環川其所居地也李
氏世傳出大唐之裔子孫向居邑城西宋李道一府
君以兵亂避地今居是爲環川始祖祖諱志和父諱
廷琇娶汪氏妣生徵君幼而穎異善記誦父書以儒

業未就而父卒家政叢脞無可委徵君憤然曰大丈夫志四方何者非吾所當爲卽不能取功名以顯父母但能創業立家亦足以垂裕後人於是棄儒從商始游雲間已而同諸父兄弟買金陵出入姑孰淮揚間徵君素負材幹一旦舍舊業入商正如巨魚投大壑縱橫出入揚鬣鼓鬣噴蕩衝激罔不如意不數年貲日以肥所置業產視昔百倍稱素封矣而徵君自視猶歛然不足時祖居已積朽幾不能蔽風雨徵君因與諸兄弟議曰堂構守成大節肯堂肯構古人所

難我兄弟賴祖宗餘庥積有剩貲若不及此時重加
締搆以貽孫謀不惟負我祖宗亦恐負時於是兄弟
翕然合志先新前堂次新門廊次後寢及廳後左右
寢樓而庖湔厠膾之設各從其居之便凡爲屋共若
千楹所費計三千金以上不踰年告成而輪奐煥焉
甲於一鄉素性又疏財重義鄉里有以急告者量力
潤之無靳色橋梁道路有圯壞者捐已有脩之父存
日嘗遺有鄉鄰負券若干數徵君盡汚爲廢紙客湖
陰有張淮者負金三百金徵君訪其家徒四壁立慨

然焚其券曰毋以是爲後人累一時客中籍籍謂徵君奇男子人有以是非質者徵君先析其是非以爲喻不解怵以禍福或其人別有所恃不恤人言徵君必閉目搖首以去曰非吾所聞也非吾所聞也故凡鄉鄰相告言因徵君而寢者十恒八九或卽有負徵君者徵君但面質其是非無幾微怒意見言面治家以纖嗇筋力爲先家積雖饒裕而終身茹苦服䟽猶然寒素無驕侈態性剛毅嘗澮有背疽命侍童持銀匙挖去其毒血流如噴觀者駭汗而徵君怡然若無

知者自奉甚菲而設客必樽俎稠疊若延師訓諸子
姓則雖家所未有必索而致之以致慇懃自以初志
未遂竭力教子以副此望比其子得入邑庠又恐督
學考限嚴命捐訾入監卒業歸又慮其肄習無所也
築書舍於里之結塢中凡爲房舍十間命其子曰此
館汝父所手築汝輩慎毋負此館負此館是負汝父
也不但負汝父汝父違祖命棄儒築此館正欲償我
逆父罪若負汝父是又負汝祖也汝輩之責重矣汝
輩在此館宜念汝父貽兩重負叢爾一身日夕不敢

怠期以必取科第功名富貴以厭爾父爾祖之望夫
然後顯汝之孝汝思之念之汝思之念之我此生所
未遂者惟讀書一念得罪吾父汝能免爾父此罪則
汝爲孝子又爲孝孫孝不匱矣若徒指爲宴閑游觀
之所吾死不瞑目時萬曆丁亥七月初旬館新成微
君發此言越本月念三僅旬日耳微君早起飲食語
笑如常至酉刻忽痰疾作不能言少許一瞬而逝噫
微君能慤懃成此館而不能俟館人之成能曲盡教
子之方而不能見諸子之有報效莫非命也莫非命

也徵君何有焉徵君生嘉靖壬午九月四日距其卒之日得年六十有六娶朱氏生女一適

姬

楊氏生男三長世裕業儒娶雙溪朱氏次世祐娶溪頭王氏次世祚娶雙溪汪氏女二長適雙溪朱全法次適予族孫子泰孫女二幼

族姪淑行狀

族姪淑以今年正月十一日卒於桐鄉之石門十七日訃至訃者云是日蚤淑起視事飲啖如常脯後過比舍解闔猶如常暮又往及門適比舍夜禱擲一小

羸出淑惡之遂反至卧内吐據案喀喀不能言鼻雙
涕出如縷引之不絕亟請醫不治明日搜其几上劑
籍見淑連日大書數紙皆古人傷生悼死句至人生
七十古來少句則三四出之若有前知者噫怪矣豈
冥冥者假之筆耶淑少失怙游學外祖長豐汪氏嘗
與群兒競登橋淑背登外舅姪邦見危之亟呵止之
淑悟悔而立若自咎者久之邦異其悔因妻以女時
邦富而淑貧衆不喻其意邦曰此子後不貧吾有試
矣淑後果有志甫弱冠卽自樹立雅習時態畧無煎

澁惟日事墳籍筆硯雖不舉士業而操筆染翰若掃
雲煙長啓短札動占屢幅與人揖磬折垂地屹然起
立兩肘翼張辭遜周旋宛然左辟博論時事信口霏
霏畧不經思至於禍福利害見有異同淑則究極環
要絲分縷解以申其是內不見已外不見人掀髯張
目黨然以往若無前者雖聞者時有拂吁而淑之情
若不容已然因淑之言而默奪潛禡者十而九矣性
尤毅不能含人過又好面斥人過然人語及淑必曰
此端人端人不惟不淑怨而反歸美淑蓋淑素不害

人不能忍淑之言而不能昧淑之心與人交久而不
褻爲人有謀或受人有託口惠而實必至或及過之
初與諸兄商淞澤垂二十年歲致皆千金非值倭寇
之耗淑已推素封矣淞澤至今信淑如蒼龜愛淑如
骨肉淑雖去日訛訛然冀淑之再至其後遷上洋轉
石門雖其所持薄不足以大成淑志然而上洋石門
之人信淑愛淑無異淞澤死之日二子俱不在旅主
人覓史圖其像而後歛觀此則淑一生之遺愛與一
時人情之愛淑可槩見矣噫若淑者謂非古人中遺

邪淑字元良號三峯生以正德壬申五月念五距其
卒之日享年六十有三娶汪氏卽邦女先淑李子長
相龍習士業娶汪氏卽汪氏姪女繼杭溪張氏溝溪
吳氏次攀龍娶石田汪氏女二招弟適金塋汪元龍
元龍亦先淑李次耀弟適汪實亦汪氏族姪孫男二
時來聘板橋楊氏時成聘渠口汪氏孫女二愛英字
石田汪子德英幼父珪祖鑑曾祖簡俱闕德不
仕相龍將求銘於大筆以瑒諸幽石謂予爲先輩知
淑請予狀淑行予已耄畧述其記憶者如右而所不

記憶者且付之口碑茲畧之也

南山金處士行狀

處士諱松字良壽南山別號也休寧璫溪人其先出
白茅金氏宋建隆間有七府君者譜失其諱由白茅
遷石田三轉而至今璫溪曾祖諱希宗祖諱璽父諱
溫母朱氏生母楊氏處士年十四失父父歿非命家
人訟其冤家日以耗十九室汪氏卒遺子俊甫二十
日二十一值回祿是歲處士家與宗人因戲而搆釀
爲劇訟交相誣訐屢年不解處士爲詞首奔馳之勞

捶撻之苦縲紲之辱何可勝言年三十二繼室黃氏
卒子安甫六歲女花朝甫十三歲四十六安又卒孫
伯鸞生甫十日俊安伯鸞花朝處士躬撫育以長以
嫁俊俊室汪氏安安室汪氏鸞先室朱氏處士再繼
室程氏女花朝皆前後先處士卒處士此生遭際如
此爲人豁達多大畧機警有智推遷避就瞬息立見
膽氣豪壯能任事亦好任事事涉於義輒踴躍身先
爲衆倡不畏禍或非義則雖行有次業必中止之故
凡處士所任事事必濟數十年來不惟一家門戶賴

處士以立雖一族之事屈指歷歷何者非處士之績
視人之事猶已之事人有謀則委赤心置其腹爭則
盡言以喻解之有欲行而不能行者則爲之指導引
翼以相其行或代之行人或以貨來則辭居常已事
雖率意行拳拳懼犯衆論或有以衆論告者處士則
受命如響與人談論衝口而出霏霏不絕尤善戲謔
諛詞雖雜出諺語俚跡間有至理故或遞傳以資笑
樂或遂傳以爲訓家庭之間以恩行義痛父早卒事
寡母如事嚴父母性乖而口譟少不適意則譁然不

寧處士趨承委曲得其懽心嘗有婦制其夫納妾者
詣母所見處士事母狀退而悔曰此亦妾出也有子
如此惡用自出遂請其夫急納妾此足以見處士之
孝感生平自奉約御賓友宗姻豐少處困拮据經營
晚歲始裕嘗豎樓五間於居南以自老卒年七十七
處士生以弘治己酉十月二十八日卒以嘉靖乙丑
正月五日長孫伯昭俊出也昭與鸞將以是月念三
殯處士於下山丐予狀爲信以求幽石之志於大方
君子予與處士皆有志亢宗予有見不能自行授處

士以行處士有志不肯專行予謂可行行之故予在
族中獨與處士以義相先處士卒予若失左右手昔
者子期死伯牙破琴絕絃而不肯與衆鼓爲無知音
也予也今將何所託以復鼓伯牙之琴也耶予也今
將何所託以復鼓伯牙之琴也耶

栗齋先生文集卷八終